

關門山遊記

古水

辛卯年十月十一 / 2011-11-06



本溪多山，其謂之關門山者，廼分長白西脈，東南距瀋陽百五十里，風景妙絕。余幸得一遊，爰爲之記。

自出瀋陽之本溪道上，稠林勝篋，千里蕃然，近則黃槭焚天，遠則蒼松染墨，目竟不得一時暇接，喟然兮嘆造物之懋力，長頌兮嗟天地之無窮。

太子河者，古衍水也，疇燕丹逋亡故地，得延厥名，其陰者今之本溪。本溪東去不盈百里，則關門山是也。

余等從嚮導入山，見漫塗俱皆峻石危崖，曾不可等凡山而視之。山路蜿蜒盤折而上，車行三刻方入佳境，而況賴足乎。廼登高而望。

是時薄雲障日，天光鱗漏，山谷陰明次第，勾勒若勁椽寫意，灑墨飛白，崇巒之聳峙，曲流之潏洄，盡落江山畫卷，真天地大手筆而人不可臨矣。披衣當風，呼吸暢極，涼爽然而快意足，實文字所難盡達。



若夫十月授衣，如是地吾意之九月即可，天氣寒涼甚矣。嚮導謂余等曰：「在關門一山，方逾九月則木葉始脫，雲蒸霞蔚，溝壑瀦池之內一時浮遍，但覺五色之迷眼。十月葉早落盡，不日將封山以待開春。」余問之：「若冬日則如何？」答曰：「若冬日則積雪齊腰，山林如裹素紈，獵人置圈套候狍兔之屬。熊羆各眠隱乎其穴。」廼知關門山內生靈各得其時，是故天人相諧。

日暮方歸，味之悠長。